


CUIMÁXP CHÁCX CUIMÍIH AC

Jesús Morales

Tíx óahhiha

Cuimáxp quij xíccaa hást ano cóii coftéocl iti cóii coi zo háaha. Cuícquee cáiiha xo quíssiiliha. Hamázzaaj chák chan ihíip chánt zo cötijmax íppaac ac iti tijx íonam ít an icah toc tíij yoque.



Óx tpactama coftéocl híp cap iti toííí to ccuóiiha xo itááxoj zíx hast íizx ano cóong cah imíitoj. Xapóo quih mos imíitoj xo mos itéemmeetma tójjoocam hást ihmáa híng cap iqui mitóij. Hást con tiennno hóox hant tomma táax hant xéppe imac quíij xahzáíi hast híp quijo háaha xo xtáassi itmis íttii yíij. Xíccaa hást ano cóii quih xtáassii hapée yóii. Táax iti toi xíccaa ta com imíitoj. Xapóo quih mos imíitoj. Táax iti toi zíx hast íizx ano cóong quih cáaccooj chácuiix tihx hax yáppolo taax coof cooppool yopah.

Táax ititoi ítoj iti hánt quihmáa cap cösíifp tama hóoxah yée zo toc tij:


—Coftéocl híng cap cuhasítóij poho. Hant háa míifp. Cuhasítóij poho xah mee.

Óx impactatax hascáaj quih tongcoj ccuíihhihi to cuómmaat. Óx tpactama xéppee ti moca imáit. Xapóo coi ánxo itacötoj itahásjoj to cuómmaat. Hascám chíij con tázzoo tí com heme tázzoo quih cuititaima íttii yáii.

Haa míhhaat iti hást cap íiccaxah iscááj tama xéppee chíppoot con tánnoojma óxah mee:

—¡Zix ccám cáaccooj ihaa intxóaa! ¡Ásjoj ásjoj! óxah yée.

Óx tpactama xíccaa coi yéen ic quiij zix cuique cáii oficj cóil hapáh quih yéen icp tij toc tijma háccaat cóoxp cáaccooj ti moca xíccaa ta mocat ánnoo tafp íixl cah itéxl itáhhít toc yíhtim. Cuimáxp con táax quicöt tom hacx cuíjhiha.




Óx tpactama zix cuique cáii oficj cóil tintica itcailma ícqui impánzx xah mímmooz xo quíhhaaha. Canóaa quíhhaa hapáh quihíhhaa táaxo cuíhhaaha yax íxöt quih cáaccooj híp cong cuíifp xo íxöt híp cong cuitacóxxoot yoque. Háaccoo tama máamma. Póixajta óx impáctaha.

Óx tpactama ícquii pánzx cah cofteocl iiffaa hapáh chaa míip. Tíx xnaicp ít táax contitat háxxooj hant cötemema cuihitáai hac iti tom itcuáaix xíccaa coi hamác ititlamma hangcáaxxaat chitsii itcuáix hax hápxo ton to cóyyoom. To cuíhoom iti ixáap toejma hax hánto tfima hánt izéecp híngc ac hást zícp míip. Hástoj íocla impah. Íicp ac icp mota to cuóyya. Háa mota yíppoon zix ccám cáaccooj xéppe ano quíihhiha mota. Háp x tongx cóoxnijo hax tahíi hax ta haa móyya.

Óx tpactama zíx ti com ittíi hápx itacl híp como iti ton to cotom ittíi hax hamáacco íssooj iqui yocáaij. Ox ipácta iti cuqx zíx ti moca cuipáhhoo cuóyyaa xah téyye.

Óx tpactama zíx ti moca cuipáhhoo cuotama cuqx ícqui isoij itcaij cuqx hóox iqui tieno to cóyyoom. Haa míhhaa cah zíx com hóox cötomtxö iyáai cah cuyóofp. Cötáfp hax ta xíccaa coi táax iti toi ptée tafp hanso ptée tfíttimma xéppee chánt chiti mahímmeej táax iti tahimij cuqx hant yóohca.



Óx tpactama hascám com mos halx coleequíi itafitlan táax iti toi hást cap iti toi ihóoctam ihóoctam iti háccaat cóoxp cáaccooj com iyóocö zíx ta hac cuóccaac. Zíx hast íízx ano cóong xahxáiihi to cuóyya. To cuota zíx com iyóocö. Itácö itáxxii mos hánt icp míhhaa taa iqui tin hápx tongx ox mee ox íhhee cah hipi hánt icp míhhaa tá hac contita téii intíyya.

Táaxo cötpactama cuáax hascám cong xéppe an itacmolca cuáax hánt quij hiz ac cuitafailcang xíccaa quih quíistox chapi íhhaa ocóaaaj chaa toi tátxo haa toima táax iqui yofáilcam. Pajíi hapáh chíicp táax congcaac chiti móii. Pajíi hantípzx quih táaccooj haa intíyya. Táax ano móiitím.

Óx tpactama tá haco cuiapácta iti cuáax ánnoo tazcam óxah yázza:

—Hascáaj quih congcaac quih cötíihhoo hácx immíhetoj. Óx impacta táax iti Cuimáxp hapáh chiti hácx cuyomíih zix quíssiilc.

Tá iti cuihíyyatiha Cuimáxp com hácx cuimíih ac cuizáxö ac.